

**Nunatsinni nerisassiarineqartut pisiniarfinni akiinut suut tunngaviusarnerat pillugu Naalakkersuisut nassuiaasiornissamik peqquneqarnissaannik Inatsisartut aalajangiiffissaattut siunnersuut. Nioqutissat qanoq iliortoqarsinnaanera akitigut nassuiaammi pisisartunut ilanngullugu pilerinarnerulersinniarlugit tikkuarneqassaaq. Nassuiaat kingusinnerpaamik UKA2025-mi saqqummiunneqarsimassaaq.**

(Inatsisartunut ilaasortaq, Mariane Paviasen, Inuit Ataqatigiit)

### **Akissuteqaat**

(Nunalerinermut, Imminut Pilersornermut, Nukissiutinut Avatangiisinullu Naalakkersuisoq)

### **Siullermeenera**

Naalakkersuisut sinnerlugit Inatsisartunut ilaasortaq Mariane Paviasen, Inuit Ataqatigiit, siunnersuummik saqqummiussinera pillugu qutsavigerusuppara.

Siunnersuut Naalakkersuisut imminut pilersorneq pillugu isummersornerinut naapertuulluinnarpoq. Nunami namminermit imminut pilersornerup annertusinissaa politikkikkut salliutinneqarpoq.

Kalaallit Nunaanni imminut pilersornermut periusissiap siulliup 2024-p naannginnerani naammasinissaa naatsorsuutigineqarpoq. Tassani aqutsisuusussaavoq, *“innuttaasut sapinngisamik amerlanerpaat inuussutissanik najukkaneersunik pitsaasunik peqqinnartunillu pissarsisinnaanerisa pitsaanerulernissaa, aammalu innuttaasut kalaalimernit aqqutigalugit inuussutissanik pilersuinermit isumannaannerulersimasumik misigisaqalernissaat”*.

Nioqutissanik najukkaneersunik niueruteqarnerup nukittunerulernissaanik, akit unammillersinnaanerulernissaanik, ersarinnerulersitsinissamik pitsaassutsillu qaffasinnissaanik qulakkeerinissap tungaanut sulissaagut.

Naalakkersuisuniit siunissaq nunatsinneersunik pisiffigisartagassarput, tamatumalu peqatigisaanik silap pissusianut sunniutitsinnik annikillitsisiffissarput isiginiarparput.

Kalaallit Nunaanni imminut pilersornermut periusissiaq saqqummereerpat tulluarpoq akitigut tunngavissat, kalaaliminernut tunngaviusussat qimerluussallugit, aammalu suliassaqarfimmi inatsisitigut pisariaqartinneqarsinnaasut misissussallugit Naalakkersuisunut pissusissamisuussaaq.

Tamanna tunngavigalugu aalajangiiffigisassatut siunnersuutip akuerineqarnissaa Naalakkersuisuniit inassutigaarput.

Taamatut oqaaseqarlunga siunnersuut Inatsisartuni kajumittumik suliassanngorlugu tunniuppara.